

26. DEC-1986

4

উপজেলা পরিক্রমা

উজিরপুর

বরিশাল, ২৫ ডিসেম্বর (সংবাদদাতা)।— বরিশাল জেলা শহর থেকে ২০ কিলোমিটার দূরে উত্তর-পশ্চিম কোণে অবস্থিত উজিরপুর উপজেলা। এ উপজেলার আয়তন ৯৫ বর্গমাইল। ১১৮টি গ্রাম ও ৯টি ইউনিয়ন নিয়ে গঠিত উজিরপুর উপজেলা। লোক সংখ্যা ২ লাখ ১১ হাজার ৭শ' ৯ জন। এর মধ্যে পুরুষ ১ লাখ ৫ হাজার ৮শ' ৭০ জন এবং মহিলা ১ লাখ ৫ হাজার ৮শ' ৬৯ জন। এ উপজেলার দু'টি ডিগ্রী কলেজসহ মোট কলেজ সংখ্যা ৫টি। এর মধ্যে ২টি কলেজ চলতি বছরে স্থাপিত হয়েছে। ৩৩টি মাধ্যমিক, ২টি বালিকা মাধ্যমিক, ৮টি নিম্ন মাধ্যমিক, ১০১টি প্রাথমিক বিদ্যালয় এবং সিনিয়র ও জুনিয়র মাদ্রাসা ১৩টি এবং এবতেদায়ী মাদ্রাসা ৬৫টি রয়েছে।

যাতায়াত ব্যবস্থা

এ উপজেলার সাথে জেলা সদরের সড়ক পথে (ফেরীর মাধ্যমে) যোগাযোগের ব্যবস্থা রয়েছে। এছাড়া উপজেলার আভ্যন্তরীণ যোগাযোগের মাধ্যম হচ্ছে নোকা ও লঞ্চ। আয়তন ৯৫ বর্গমাইল। অবশ্য আয়তনের তুলনায় সড়ক ব্যবস্থা অপ্রতুল। পাকা রাস্তা ৩.৫ মাইল এবং কাঁচা রাস্তা ১২৭ মাইল। শুধু মাত্র উপজেলার সদর এলাকায় রিকশা চলাচল করে।

কৃষি

এ উপজেলার মোট জমির পরিমাণ ৬১ হাজার ৩শ' ৭২ একর। এর মধ্যে চাষাবাদযোগ্য জমি ৪৫ হাজার ৪শ' ৯২

একর এবং অনাবাদী জমি ১৮ হাজার ৮শ' ৮০ একর। ধান, পাট, আখ ও পান এ উপজেলার প্রধান উৎপাদন ফসল। এখানের ৩১ হাজার একর জমিতে আমন, ২০ হাজার ১শ' ৮০ একর জমিতে আউশ, ৪ হাজার ৫শ' জমিতে বোরো চাষ করা হয়। এ ছাড়াও তোষা ও দেশী পাট ৩ হাজার একর জমিতে, পানের বরজ ২ হাজার একর জমিতে এবং আখ ১৪০ একর জমিতে চাষাবাদ করা হয়। পান উৎপাদনের জন্য এ উপজেলা বিশেষ উল্লেখযোগ্য। কৃষি কাজের জন্য শক্তি চালিত পাম্প রয়েছে ১৭০টি। শিকারপুরে বি, জি, সি পাট কেন্দ্র রয়েছে। এ কেন্দ্রের আয়ের লক্ষ্যমাত্রা ৩০ হাজার মণ।

চিকিৎসা

এ উপজেলায় একটি স্বাস্থ্য কেন্দ্র রয়েছে। প্রতিদিন গ্রাম অঞ্চল থেকে শত শত রোগী চিকিৎসার জন্য এখানে আসে। হাসপাতালে ওষুধের অপ্রতুলতার জন্য দরিদ্র রোগীদের সুচিকিৎসা হচ্ছে না। ওষুধের ব্যবস্থাপত্র নিয়ে বরিশাল জেলা শহরে আসতে হয়।

খাবার পানি

এখানকার অধিকাংশ অধিবাসী নদী ও খালের পানি খাওয়া-দাওয়ার কাজে ব্যবহার করে থাকে। বিশুদ্ধ খাবার পানির অভাব তীব্রতর। এখানে গভীর নলকূপ ৫১টি এবং অগভীর নলকূপ ১২৫টি রয়েছে। এর মধ্যে কয়েকটি নলকূপ অকেজো অবস্থায় রয়েছে। জনসংখ্যা তুলনায় এ নলকূপের পরিমাণ অতি নগণ্য।